

## უსიყვარულოდ

უსიყვარულოდ  
მზე არ სუფევს ცის კამარაზე,  
სიო არ დაჰქრის, ტყე არ კრთება  
სასიხარულოდ...  
უსიყვარულოდ არ არსებობს  
არც სილამაზე,  
არც უკვდავება არ არსებობს  
უსიყვარულოდ.  
მაგრამ სულ სხვაა სიყვარული  
უკანასკნელი,  
როგორც ყვავილი შემოდგომის,  
ხშირად პირველს სჯობს,  
იგი არ უხმობს ქარიშხლიან  
უმიზნო ვნებებს,  
არც ყმაწვილურ ჟინს, არც ველურ ხმებს,  
იგი არ უხმობს...  
და შემოდგომის სიცივეში  
ველად გაზრდილი,  
ის გაზაფხულის ნაზ ყვავილებს  
სულაც არა ჰგავს...  
სიოს მაგივრად ქარიშხალი  
ეაღერსება  
და ვნების ნაცვლად უხმო აღერსს  
გარემოუცავს.  
და ჰკნება, ჰკნება სიყვარული  
უკანასკნელი,  
ჰკნება მწუხარედ, ნაზად, მაგრამ  
უსიხარულოდ.  
და არ არსებობს ქვეყანაზე  
თვით უკვდავება,  
თვით უკვდავებაც არ არსებობს  
უსიყვარულოდ!